



00954

同治元年重鐫

霍文敏公全集



存頭書院藏板

霍文敏公文集序

嘉靖庚子歲冬十月太子太保禮部尚書

詹事府詹事涓厯公卒於位訃聞於

朝

嗟悼賜以祭墓命禮官議謚以聞禮官會

議

制曰可迺謚文敏予仰而歎之曰禮官之議

皇上之見可謂不易之典矣因推而衍之昔公

文敏公文集

倫序

會薦南宮魁於多士議大禮明倫典一洗

漢唐宋之陋而空之贊

皇上之孝成萬世之法慨聖學迷晦則註明程

朱正訓深闢世儒陸氏之說與夫序記詩

文跋說銘傳動皆警人不作無益語浩氣

溢出如長河廣漢一瀉百折而莫之禦可

不謂之文乎諸疏之陳痛切時政洗剔蕪

穢指摘瑕垢極發揚震厲欲一舉數十年

之弊而更新之以復

祖宗之舊與夫簡札論辯不可窮詰如利刃出

硯光芒炫怵其鋒莫當用能以孤忠直節

受知

當宁擢於權奸而不動憎於衆口而不惑清議
精明百工惴慄可不謂之敏乎謚曰文敏
可謂不易矣適公之子與瑕與琦緝公之
集爲十卷將梓以傳請序於予予曰文敏

文敏公文集

倫序

二

者公之實錄而茲集也者又文敏之實錄
也昔韓昌黎送廖道士嘆嶺南瑰犖奇偉
之氣不鍾於人而鍾於物一或有之又出
於異端方外之徒今觀公以明沛之識宏
博之學峭崛之氣昌大之才舉天下而鼓
舞之殆山川間氣靈炳之所發洩而鍾焉
者也使昌黎遇之必不爲一黃冠而興嘆
矣公益繼張曲江之後曲江既相不能免

於李林甫之猜忌功業弗究識者大以爲憾公之踪跡殆類之今公沒後十餘年思公者如一日其朝之士覩夫善人重足惡夫揚眉國是日搖世事日感天下之勢駸駸入於潰溺而不可挽則曰使涓厓若在其何以至此哉其鄉之士覩夫儉夫餒士飽飫囊橐凌蔑鄉國夸駭閭里甚則踰節蹈淫穢惡宣著風俗日益頹敗而不可救

文敏公文集

倫序

三

則曰使涓厓若在其何以至此哉世謂公議論多過激夫中正者道也激者時也道雖無激而有時乎爲激涓厓之激激於時也觀其時證其言思過半矣夫參苓之劑可以延年以之治病則不利於攻解霧縠之組可以章服以之禦寒則無益於體膚取涓厓者當并其時觀之若夫參苓霧縠非不美也夫固有所待也

嘉靖壬子冬十一月上澣

賜進士出身奉議大夫南京通政使司右叅議
前翰林院庶吉士浙江道御史倫以諒撰

文敏公文集

倫序

四

霍文敏公文集序



君子有意於爲文乎夫文者言也言心聲也聲發而有章謂之文故文者由中而達外非強作也昔者夫子贊易於渙曰風行水上蘇氏曰是天下之至文也夫風輕清上浮天之氣也夫水淵凝下注地之質也以風之輕揚而得水以著其施斯麗而有象以水之凝注而得風以揚其清斯煥而

文敏公文集

金序

一

有章合天地以成能妙陰陽而並運光昭闔闢變態萬狀誠哉天下之至文也顧風之與水何心於遇亦何意於文哉一自然而已矣然則斯道之具於吾心其水之涵凝者乎言之發於吾聲其風之播揚者乎道以凝其質而匪虛言以發其華而不俚以體天地之撰以類萬物之情以通神明之德以達古今之故由中而出五色順施

斯其無忝於至文矣乎古今言文者有二
曰闡道之文曰紀事之文闡道者章明世
教六經語孟是也濂洛諸賢其次矣紀事
者述世經務遷固諸史是也董韓諸子其
幾矣外是而有意爲文雕刻點綴月露風
雲藝焉而已至文云乎哉

明興道化淪浹人文宣朗若先達諸名公翊

皇輿光竹策者盛業雄文後先輝映卓乎不可

文敏公文集

金序

二

尚已余嘗竊論其世如文敏涓厓霍公謂
非諸先達之傑然者乎公幼有大志及大
魁天下入兵曹當

武皇時已籍籍有聲乃去卧山中淳澗彌至迄
世廟嗣統公議正大禮上合

宸衷虛席屢

召四載方起屹立

朝端海內想聞風采觀其進退人才辯釐政

體察機宜先要務見於諸疏議所陳疊疊
不倦視古之匡辟陳謨嘉猷入告者蓋庶
幾焉故讀公之論著則知其灑氣宏才貞
心直節至於上明天道下綜人事當官之
誠飭世之規自身而家而達之天下如大
海卒遇長風奔濤四溢起伏抑揚呈瀾飛
玉莫非寫其心得浩蘊而犂然自著沛乎
有章初非作意而強爲之玩其辭想其人

足以風乎後之君子使得叩鍾孔庭行行
如由侃侃如賜而文學名科又不與游夏
並駕而爭先乎卽董韓諸子抑且揖讓未
遑矣然則論公之文述世經務乎哉益心
存於衛道者也卽未敢遽語其至視世之
雕刻點綴空言無補者奚啻逕庭云往歲
甲戌敬先君獲附公爲同年友自齠時卽
已仰公風節今老矣復得與公嗣勉齋君

同官豫章觀公著作之盛探公之寶藏炳
郁益起敬焉始未知先達諸名公果孰爲
之先後也勉齋君重刻公作請予叙之予
以義協世講不得辭故述風行水上之說
質諸勉齋若公之涵凝浩蘊固未測其津
涯也

萬曆丙子秋八月既望年家晚生臨海金
立敬謹撰

文敏公文集

金序

四



文敏霍公文集序



古之大臣以道事君德業文章彪炳宇宙
未有不自忠藎之一心而爲之根本如賈
長沙之獻策陸宣公之奏議孤忠勁節載
在簡策千百世下猶嘖嘖稱道勿衰有明
三百餘年吾粵山川間氣篤生賢哲著廟
廊之勲烈者不乏其人求其正氣亘古今
鴻文葢宇宙則以吾郡南海

文敏公文集

鄭序

一

文敏涓厓霍公爲最著子生也晚不獲親承
道範然竊聞公學究天人心印洙泗卓然
爲一代儒宗自南宮大魁厯階宗伯其見
之奏疏皆名言碩畫生平著述盡經世宏
詞用能挽回世運匡正君父宏濟蒼生古
大臣正色立朝公忠體國奠乾坤於掌上
何以過之沒後遺草公之子僉憲勉齋公
彙刻成集海內名流慕其風服其文莫不

奉之爲龜鑑國變鼎遷棗梨殘失幸而舊
帙猶存諸孫不忘祖德編緝而付剞劂屬
予一言以序其首予肅然起敬曰表揚先
正昭示來茲固予所願哉夫文者天地之
精華也天非日月何以照臨地非山河誰
爲奠麗今公萃天地之靈氣漁六經獵子
史陶鑄百家蓄之胸中運之筆下闡聖賢
之理與維帝王之風化正千秋之名義削
一世之權奸凜冽如飄風汪洋如滄海精
神貫注楮墨生光訄謨入告上格穹蒼他
可知矣今觀其議大禮一疏當世廟朝龍
興潛邸幾以祖宗大寶難全父子私恩在
廷諸臣堅執宋儒身爲人後之說公明目
張膽激切直陳獨以繼統不繼嗣明千古
之大義黜拘儒之偏見舉朝震動而公弗
顧忠誠所格天日開朗陰霾頓消而萬世

之名教綱常竟賴以正此聖賢之至文而
折衷於道者也至於論鹽政之流弊權鈔
法之變通閔場丁之貧困陳利病之三策
深未雨之隱憂籌兩淮之鹺政既能上裕
國計更可以綢繆根本則又古社稷臣本
憂國憂民之心而形之疏議也其他條奏
如正風俗祭好黨究積弊恤民困侃侃數
千言皆切中時事衆是獨非衆可馱否激

文敏公文集

鄭序

三

昂慷慨犯斧鉞冒嫌疑披忠瀝素不啻痛
哭之書也若夫序記詩文說銘傳跋昌明
博大灑氣盤鬱雄詞奔放如黃河千里又
如鷹隼摩空小儒見之俯首喪氣假非根
之於心本之於道無論風雲月露無裨實
用卽偶一封章摘瑕媒短鈞竊名譽而非
忠君愛國終爲粉飾虛文其去公奚止霄

壤哉方今

聖天子神靈御極大化覃敷猶復購求古書博
訪文獻以參考治道吾粵僻處天末自曲
江丞相以後文運日開至明而梁文康丘
文莊陳白沙海忠介諸君子前後接踵而
公復以文章道德兼綜條貫忠盡風節卓
越古今此蓋發天地之精華以化成天下
美哉斯集行將獻之

當宁命詞臣考正流布胥四海而楷模之又

文敏公文集

鄭序

四

不特作高會規矩爲一家法則而已也是
爲序

崑

康熙四十八年歲在己丑長至日

賜進士第徵仕郎翰林院檢討充

大清一統志

三朝國史纂修官前

特簡吏科給事中甲戌科會試同考翰林院

清書庶吉士年家後學鄭際泰頓首拜撰



文敏公文集

鄭序

五



清書庶吉士年家後學鄭際泰頓首拜撰

霍文敏公全集序



士先器識而後文藝何也孟子曰有一鄉之士有一國之士有天下之士其器其識蓋乎一鄉此一鄉之士也蓋乎一國此一國之士也蓋乎天下此天下之士也無器無識不可以言士不可以言士則斗筭之人是也然則論士者亦但論其器識可矣而奚以文藝爲也曰世固有有文藝而無

文敏公全集

徐序

一

器識者未有有器識而無文藝者惟求器識於文藝之中而器識卽於文藝而見夫是之謂先器識而後文藝耳吾邑 霍文敏公天下之士也天下之士則必有蓋乎天下之器識而後可於何見之於 公所上之嘉靖三劄而知之也世徒見 公議大禮破拘儒之論而緒世宗之知遂以爲公之文章莫大乎是而世宗亦實爲能知

公者此殆耳食之見無當於知人論世者
也 公以正德九年成進士觀政吏部卽
上疏乞歸畢婚旣畢婚卽往西樵山讀書
不復出迨武宗崩世宗入繼大統 公適
以此時出山懷三劄以往此三劄者首論
人主爲學爲治之要次言六部之大綱三
言庶政之積弊前後不啻萬言言言切中
此必非 公一日之言殆平日讀書之所

得如有用我舉而措之者也不圖甫抵京
而大禮之議已起夫是以先論大禮而後
進三劄也大禮之言 公一時之言所以
破拘攣之說者也三劄之言 公平日之
言欲佐世宗以大有爲者也世宗之欲考
興獻此雖一人之私而亦未嘗非天下之
公也不必爭者也武宗之瀆亂天下天下
岌岌此大臣之憂而亦天下之深憂也所

當急救正者也使當時爲大臣者亦能如
公之用心以天下爲己任則大禮可以不
爭大禮不爭則君臣一心共圖致治不獨
公所上之三劄可以次第舉行而凡天下
士之有懷而欲白者皆將輕千里而來告
之以善矣豈不臣主俱榮而千載一時之
機會哉不務出此必欲以其不近人情之
說強人主以必從而又相率去位以要之

伏哭以怒之此何爲者也蓋自是而世宗
始薄朝士矣薄朝士因而薄宋儒矣以朝
士之所主者皆宋儒之議故也且也薄宋
儒因而薄祖宗矣以祖宗所用以取士者
無一非宋儒之說故也是故未幾而議分
祀天地矣議孔子廟號矣議百神祀典矣
以英年未學之君儼然自負爲制作之司
命自是而後諛佞日進忠義益衰夏言嚴

嵩互相傾軋能中主欲者必勝稍犯主忌者必亡明祚之不振皆此大禮之爭之有以激之也乃若公之用心則不然矣其未上大禮疏也先以其議示蔣冕毛澄欲令主議者參酌施行而不欲其出於小臣之手豈不以爲大臣者當集思廣益共成君德而不可以拘迂之說拂其天性而使之不信大臣者哉迨澄等堅執不可而後

上之及其上也又自誓若得禮明破千古謬卽當棄官終身不出故正德十六年八月上大禮疏嘉靖元年正月卽上三劄其意蓋謂禮制旣明卽可以置不復道而人主卽位之始所當孜孜汲汲力除積弊以復祖宗之舊章而後爲中興之盛業其器其識視世宗爲何如主而自視爲何如人哉不意世宗之取於公者又不以其圖

治之切而獨善其議禮之精蓋大禮之爭
迄五年而後定主考孝宗者盈廷皆是而
主考與獻者獨 公與張璉桂萼席書方
獻夫數人而已 公於嘉靖二年三月已
兩疏乞歸世宗自覺其勢之孤故屢欲召
公以排羣議而置 公之所以經營天下
者於不問而 公則但欲其道之行故屢
辭召命以息羣疑而欲世宗留意於其所

文敏公全集

徐序

五

上之三劄此所謂相遇而不相知者也故
謂世宗以大禮之故而能貴 公則是謂
世宗以大禮之故而能知 公則非謂
公欲以大禮之議而上要世宗之知則非
謂 公欲以大禮之議啟悟世宗而因以
卜其道之或可行則是也世宗固未能知
公而 公亦不能知世宗者也世宗惟不
知 公故徒貴 公之身而不能行 公

之道 公惟不知世宗故雖以大禮蒙眷
而卒不能依阿渙忍以媚悅取容蓋嘗論
之明自中葉以後英斷而有爲者莫過於
世宗其受人蒙蔽而終身不悟者亦莫甚
於世宗世宗以有爲之資而卒至於剛愎
而自用者則大禮之爭有以激之也其後
沈鍊楊繼盛諸人惟不能知此故進其慷
慨激昂之說以至於殺其身夏言嚴嵩徐

階諸人惟能知之故挾其將順迎合之私
而遂得行其術夏言之知世宗不若嚴嵩
故嚴嵩能殺夏言嚴嵩之知世宗又不若
徐階故徐階能去嚴嵩 公惟不能爲夏
言嚴嵩徐階故亦不能如諸人之深知世
宗而不免爲夏言之所困猶賴有大禮一
議預有以得世宗之心否則 公之一生
對君上對僚友皆直言無隱徑情自遂其

不爲沈鍊楊繼盛之先聲者蓋無幾矣豈
不悲哉 公有石頭錄起於正德之十六
年正月一日月有書日有記而終於嘉靖
之十九年六月十一日記太白經天遂爲
公之絕筆蓋至是而 公亦知道之終不
行矣是年九月朔上災異自陳疏謂臣初
年猶誓心勵忠輔陛下坐致太平期革積
弊期汰冗官期省冗費期化貪濁期安邊

境期靖夷虜期厚民生以植國本期處宗
藩以鞏國基乃今日擊積弊日增冗官日
濫冗費日繁貪濁日肆邊境日疲夷虜日
橫生民日困宗藩大勢日益難處懍懍乎
有隱伏之憂臣不惟不能處復不能言伏
乞聖恩賜臣罷黜用銷災變疏上而世宗
猶有用心供職不允辭之旨而 公卽於
是年十月七日薨矣讀 公此疏與 公

嘉靖元年所上之三劄知 公之心實欲
行其道於天下其眷眷於君國子民者始
終如一日而世徒以大禮一疏謂足以覘
公之學問是仍未知 公之器識有高出
於尋常萬萬者蓋非徒一鄉一國之士而
實天下之士也 公初年上揚遂菴書有
曰宋儒學問動思三代而致君圖治之效
不及漢唐顧未有命世大儒起而掃之今

文敏公全集

徐序

八

之士夫動多掇拾其唾餘而噉嚼之此士
習所以益卑政治所以益弛我祖宗之舊
章所以日益廢格民日益困財日益匱大
勢日有不測之虞而當事君子莫或之省
憂也嗚呼此足以知 公之器與識矣

余

久慕 公之爲人欲得其文章而盡讀之

壬戌歲 公之裔孫適楷欲重梓 公集

因以其家舊刻涓厓文集及 公年譜囑

余再加編定謹按渭厓文集係 公子與

瑕勉齋公編次惟內有詩詞家訓蒙規若

干首不僅於文不若總括以 文敏公全

集尤爲該備又所作 公年譜相傳亦爲

勉齋公手定而門人沈應乾註釋何世守

參訂今細閱之自正德十六年以後嘉靖

十九年六月十一日以前皆 公手記之

石頭錄餘係 公後人纂輯與其存此而

文敏公全集

徐序

九

併改 公之石頭錄以爲年譜不若仍存

公之石頭錄附於 公全集後卽以是爲

公自作之年譜猶不失本來之面目也惟

自成化二十三年迄正德之十五年暨嘉

靖十九年八月朔一日後此則石頭錄之

所未備者宜以前爲補石頭錄前編後爲

續石頭錄後編則 公一生之出處大節

可以展卷瞭然而凡 公之子孫能讀

公書而有志於繩祖武者可無疑於是刻
也已為序

同治紀元夏五月

賜進士出身

欽點即用知縣歷任湖南華容耒陽縣知縣告
假在籍邑後學徐台英頡首拜撰

文敏公全集

徐序

十



霍文敏公全集校梓名錄

同邑後學何又雄

同邑後學潘健榮

同邑後學黃迪

同邑後學招成鴻

同邑後學勞鴻勳

十六傳孫 熙

十六傳孫 毓鏊

十六傳孫 文敷

十七傳孫 壽榮

文敏公全集

校梓名錄



霍文敏公全集目錄

卷之一 上

疏 凡二道

大禮疏

辛巳十月八日上時為主事

嘉靖三劄

元年正月十一日上時為主事

卷之一 下

疏 凡七道

論大臣封伯疏

時任兵部主事

論六科疏

乞養病疏

文敏公全集 目錄

再乞養病疏

召命辭疏

辭陞少詹事兼學士疏

謝 御書兼辭陞職疏

卷之二 上


疏 凡九道

大禮考証疏

謝 恩疏

議處黃河疏

救積弊疏



辭免詹事疏

再謝辭詹事疏

辭免日講疏

鹽政疏

議任大臣疏

卷之二下

疏 凡十五道

儲材疏

裨治疏

乞 有憲臣疏

與方公聯名

文敏公全集

目錄

慎保 聖躬疏

采舊臣遺議疏

辭免禮部右侍郎疏

再辭禮部侍郎疏

辭免禮部尚書疏

再辭禮部尚書疏

三辭禮部尚書疏

論聶能遷罪狀兼辭禮部尚書疏

五辭禮部尚書疏

悼靈皇后喪禮疏

地方疏

夷情疏

卷之三

疏 凡四道

謹天戒疏

節冗費疏

謝扇疏

脩書疏

卷之三

疏 凡十九道

文敏公全集

目錄

三

國是疏

與羅峯見山書上楊邃菴書併附

給假疏

再乞給假疏

三乞給假疏

謝

恩兼辭郵典疏 己丑十月上

謝辭

郵典疏

議郊禮疏

庚寅二月上

復

聖諭疏

附錄與夏公謹書名言

謝

恩待罪疏

庚寅三月初九日上疏入夏公劾
下下都察院獄

再謝

恩待罪疏

庚寅四月二十六日上先是三月二十六日
至四月朔天霏上傳旨宥之

辯明讐誣疏 時丁憂家居

進神箭疏 時起復吏部侍郎途次

奉慰疏 途次

到任謝恩疏 吏部左侍郎

大同事宜疏

自陳不職疏

擴大公以贊聖治疏

謝賜胙疏

乞昭聖斷定禮義正中垂式臣工遵守疏

文敏公全集 目錄

四

卷之四 上

疏凡二十四道

申明禮制疏 時任南京禮部尙書

乞恩罷黜以避讐嫌疏

陛辭疏

懇乞聖明照察奸黨疏

慶賀疏

乞恩賜封疏

公薦舉疏

公薦武職疏

正風俗疏

時南京禮部尚書

明禮制疏

定禮制疏

自陳疏

修省疏

再定禮制疏

姦黨欺隱

敕旨公文增減緊關情節疏

陳愚悃疏

屬官壞法疏

認罪謝恩疏

文敏公全集

目錄

五

應詔獻言疏

黜異端詐術以杜姦欺疏

清娼籍以正倫類疏 稿失

乞養病疏

乞致仕疏 稿失

感恩獻愚少裨東宮聖學疏

與鄒守益聯名 聖功圖說自世子問安至高宗訪道共三十篇附

卷之四

下

疏 凡十二道

辭加秩疏

災異自陳疏

聖功圖奉 旨免罪謝 恩疏

考察自陳疏

到任謝 恩疏

禁訛言疏

查究賄賂疏

再疏

民困疏

祀議疏

欽奉

聖諭疏

疏留中獨

詔責楊太僕

文敏公全集

目錄

六

災異自陳疏

卷之五

上

議 凡一道

大禮議

辛巳六月送禮部附錄毛尚書東復毛先

序 凡二十一章

遊西樵序

贈戚邑侯考績序

併詩

贈縣丞王肅菴序

贈黃性之序

汪北山文集序

贈謝繼之考績序

送楊少默歸潮陽序

送黃才伯序

名佐

送甘于盤出樵山序

名學

送湛少防序

名東之甘泉長子

送邱宰考績序

名道隆

送張柏山序

贈洪通判序

贈番禺司教熊子忠序

贈番禺衡大尹序

文敏公全集

目錄

七

贈王巴山督學序

贈朱司訓致仕序

敘秋江餞別詩再贈王巴山督學

送朱僉憲進 萬壽表序

民謠序

為兵備王藁谷作名大用

書松溪集後序

梁員外焯父

卷之五

下

序

凡四十七章

鶴翮清秋詩序

書東瀾別舫後序

訓二氏序 爲馮秉文林壯

賀秦司教序

樵儲錄序

贈羅訓導考績序

晚秋翁序 甘學父

觀潮序 爲友董木洪

雲石序 爲丹山

征西詩序

思齋序 爲莆鄭啟範

敘采樵卷後 贈魏太守

文敏公全集 目錄

八

贈港都長序 時港爲都之長

海國南薰詩序 爲東莞尹王

龍起秋潭送王用儀序 名漸遠主事

敘南州輿頌卷 爲陳教官

百里歡聲序 程鄉張大尹

賀壽序 爲鄉親談元敷婦翁

守軒序 爲同年盧公名士與父

龍厓序

南溟躍鯉圖序 爲秦教官

述賀雍穆序 九江村陳氏

龍湖隕玉卷序 為海豐烈女林氏

東山序 彭時可進士為東山求

壽蟠岡母舅梁桂叢序

坦菴壽序

送謝少傅相公致政南歸序 名遷

送嚴侍郎使安陸序 名嵩

送楊春坊觀察山西序 名維聰

蕭都憲巡撫延綏贈言序 號麗川

許襄毅公經畧西番錄引 名進

恭題明良集後

文敏公全集

目錄

九

敘王文恪公集 名鰲

敘來雁軒集 為顧中書亭

敘監歷刻

題白中丞文集 名折

釣臺集序

贈王大尹宰香山序 名正色

贈倫白山大司成序 名以訓

贈周實夫之任思州太守序 名文光

贈賀長教歸廬陵序 名鈞

贈黃子省會序

贈葉同府之任建昌序 名基

世誼序 與李公希說等七同年會

贈楊子之任夔州太守序 名琇

送鄒東郭之任南學士序 名守益

會試錄後序 嘉靖八年己丑

卷之六 上

記 凡三首

嶺表書院記 廣西

宋余襄公靖祠記

見古書院記 南京禮部公署

文敏公全集 目錄

跋 凡五首

讀定山先生祠堂記跋 莊公名景

題康德涵王敬夫卷後 名海名

題趙景仁卷後 名時春

書袁靜庵贈文後 名宗儒

題汪雲程言兵法疏末

說 凡一首

字三子說

傳 凡四首

三廣公傳 陶魯

贈太傅諡文康梁公傳

名儲

龍山君傳

為揭陽進士黃一道父

橘洲傳

孔目蔡羽父

碑銘

凡九首

贈尙書湛公神道碑銘

太保尙書諡恭襄王公神道碑銘

名宗明

禮部左侍郎致齋黃公神道碑銘

前順天府尹劉公墓誌銘

名淑相

五兒與斌壙誌

侯郎中墓誌銘

名元

文敏公全集

目錄

十一

高廉使墓誌銘

名叔嗣

十峯程憲副神道碑銘

程公文德父

李子子長先生墓表銘

狀

凡四章

召命辭移使司狀

甲申年

呈兵部狀

召命辭狀移使司

為廣庠請梁文康公祠祀狀

癸巳年

祭文

凡二十七章

告墓

為不請

封贈告

西庄父墓

祭丈人區北溪

祭區元清大舅

移清遠縣峽山神

祭梁文康少師

祭王晉溪冢宰

祭彭幸菴大司馬

名澤

祭胡節菴憲副

慶成祭告

祭李敘菴少師

名時

祭襄虞侍御周公

文敏公全集

目錄

三

祭莊定山

祭鄒封君

憲副守愚父

九卿祭敘菴

祭侯母太夫人

侯都位母

祭黃致齋宗伯

祭吳憲副

名大本

祭張羅峯少師

名字敬九卿同

祭張羅峯少師

公祭鄧賁齋司訓

名德昌

祭甘于盤親家

祭陳公贊親家

祭賁翁司訓

祭陳少謙婿 舉人

祭區元派大舅 丙申

祭區益莊寄閑松愚 丙申

合巹祭告家廟

卷之六 下

書 凡二十二章

與蕭子雍提學 名鳴鳳

復使司江林兩先生 甲申

文敏公全集 目錄

三

答彭芝田太常 名澤甲申秋九月十五日

與朱貳守

上楊邃庵閣老 名一清

與林方伯 名富

與芝田白山

與胡靜菴尙書 名世甯

與晉溪王先生

復陽明先生 名守仁

與李家宰

與康對山 名海

與晉溪王先生

與林汝桓 名應聰

與李遜菴

與田提學 名汝成

與陶南川都憲 名諧

與朱都憲

與陳侍御 名大用

與管巡撫

復湛甘泉尙書 名若水

與張羅峯

文敏公全集 目錄

卷之七 上

書 凡二十一章

與張東瀛尙書 名瓊

與戴巡按 名璟

與鄧賁齋

與方西樵閣老 名獻夫

與孫憲副性甫 名存

與于中丞 名湛

與王太守 名儀

與陸李兩方伯 名杰名中

聞羅山訃慰疏 附錄涇野東

復呂涇野 名柎

再與呂涇野

慰張生中翰疏 名遜業

與王浚川尙書 名廷相

再與浚川尙書

與蔡鶴江少宗伯 名昂

與汪中丞 名文盛

與洗奕倩 名桂奇

與湛甘泉

文敏公全集 目錄

五

與嚴介溪尙書

與嚴介溪尙書

與嚴介溪尙書

卷之七 下

書

與郭冢山書 凡十四章名肇乾字體剛

家書 凡二十四章

詩

四言古詩

送溫學士省親 名仁和

衍聖公酬述

贈吳白樓尚書南京吏部

鍾石詩

有序

王陽明中丞平盜詩

六章有序

汪憲副誠齋平山海戎

十章

贈魏太守考績

五章十一月五日在樵

重贈

丹厓

六章

明所

四章

玉田

四章

文敏公全集

目錄

六

終慕卷

四章

竹軒

四章九月在廣

送高明嚴子之京

四章九月在廣

贈梁純禮還程鄉

四章

遯齋挽

四章

萬竹軒

秦掌教考績

三章

李太守母貞節

六章

雲峯

為太守何獻卿文邦九章

琴山

十章

萬氏四忠三節詩 五章

感忠雅 八章次甬川韻爲誠齋

詒穀 用甬川韻

昭恩雅 四章次甬川賀誠齋

鳳山秦老先生致政 三章

周白川都憲考績 四章名用

王南渠司寇考績 三章名壙

我有兩賀 爲本鄉陳東峯倫致菴

吳中丞鎮蜀 三章名山

贈袁少司徒 名宗儒

文敏公全集

目錄

蘇一峯侍郎考績 三章名民

宋中丞轉北 三章名景

粵有六章 贈何公宏戴公嘔麥公孟陽外補

送二子璞瑕歸四峯兼戒示山中諸子

賀蔣石庵壽 名璠

神樂觀同年會 八章次圭山韻

圓邱樂章 九章

五言古詩

贈大司馬秦鳳山致政 名金

贈廷尉丞徐楓岡考績

贈孫少參應奎

三至軒詩有序用太白感興八首為章江公

贈大司馬桐谿錢公總制兩廣名如京乙未

贈方棠陵二十首名豪用陶飲酒韻

賀梁儉菴壽詩尚書名材

贈趙子守順慶四章名鑾

賀劉惟靜乃子新進士公事到南都與同年

會名彭年名起宗

贈湯九山名厲白沙門人次甘泉韻

贈白沙先生孫陳畬次甘泉韻

文敏公全集

目錄

六

七言絕句

夢繪蓮花題首句足之呈冢山

鐵泉懷賁翁五首

聽鐵泉和韻五首代羅舉人一中作

癸巳中秋又一日同兩岡遊雲端至鐵泉有

懷三首

次廖洞野十首發老株塘其一
名道南時游銀山

度沙嶺其二

經望寶山其三

入中峯寺其四

懋松蓬菴 其五

登中峯嶺 其六

望遼海 其七

望喜峯口 其八

望大甯 其九

望迤北 其十

尹先舍弟以詩見勉次韻答之 二首名在

題蟠岡古橋號

七言律詩

贈方西樵出山

文敏公全集 目錄

九

和彭時可 名端遇

浴日亭次東坡韻

樵翁大學士歸贈 甲午

樵翁歸山聯贈偕倫白山

次右溪峽山韻贈鄧賁齋

倫右溪以詩贈行次韻留別 名以諒

答胡節菴 名禮

讀桂文襄公誌銘有感聯句 名萼

鉛山舟次聯句贈梁瀾石使節廣南 名廷振

秋興懷故山聯寄金仁甫 名山

玉堂雙喜聯賀倫白山 二首

中秋夜飲次賁齋聯句

中秋夜飲

寄郭太守步韻

贈巴山

丹厓

送邱知縣道隆

小金山

卽事 遺四句

呈冢山

文敏公全集

目錄

惶恐灘阻風

重過釣臺 二首

經金山用杜韻 四首

除夜自省 甲午

遊銀山用杜韻 八首

約重遊鐵壁次陽峯張學士 名璧

丁酉除夜

宮僚燕集次松臯太宰 三首

次甬川東閣書懷 庚子

庚子秋對月賞菊用杜韻 絕筆

水調歌頭 凡二十一首

寄懷賁齋

樵翁歸贈

再答樵翁 三首

次納涼 三首

古邊情 四首

甬川先生示讀學規之作譽借太過次韻奉答

次論學答甬川 二首

次論詩答甬川

復姓詞爲鍾少司徒 名芳

文敏公全集

目錄

三

荆蘭圖爲鍾少司徒

有所思和白山

陽峯詞爲張學士

仰宸樓爲陽峯題

卷之八

上

吏部公題 凡三十道

題請吏部尙書疏

請 旨令南京兵部尙書劉龍具實自陳疏

題覆御史奏參科罰民財疏

題覆言官薦舉人材疏

題覆吏部尙書員缺懇免會推請 特旨擢任疏
題覆延綬巡撫于桂自陳致仕疏

題覆國子監祭酒請疏壅滯昭激勸疏

題覆應天巡撫侯位乞解任侍養疏

題請先行考選風憲官員疏

題覆御史沈應陽參劾各員請分別辦理疏

題覆御史王鎬參劾各員請分別辦理疏

題請考選風憲官開列人名仍請 欽定疏

題覆南贛僉都御史陳察論薦人才疏

補奏推升順天府丞缺應補人員疏

文敏公全集

目錄

三

題覆病故輔臣贈官疏

題覆鄖陽巡撫參劾各員附參知縣王室疏

奉 旨參處三邊總制姚鏞疏

比例陳情乞與故輔臣蔭敘疏

題覆總理河道劉天和參劾各員請分別辦理疏

題覆兩廣都御史陶諧參劾大員及守令疏

題覆貴州巡按御史王杏參劾各員疏

奉 敕諭興建各大工覆奏疏

題覆承襲懷柔伯據實參駁疏

題請給與乞休布政使張原明京職疏

題覆廣西布政使咨行土官襲職疏

題覆陝西巡按御史周鈇論薦人才疏

題駁太常寺吏不得比例乞 恩疏

請慎選賢才以重科道疏

題覆給事中李克濁奏參應天巡撫侯位疏

題覆三邊總制奏請給故尙書彭澤卹典疏

此疏

未上卽遷官

卷之八

下

吏部公行 凡十一道

咨雲南布政應否令土官高齊斗承襲由

文敏公全集

目錄

三

咨雲南布政應否令土知府瞿氏掌印由

咨貴州布政查覆土官楊載春應否給 救命由

咨貴州布政應否令土婦安氏承襲職官由

咨四川布政應否令土舍董鸞襲替由

咨四川布政查土官王祥 臣 是否應襲替由

咨廣西布政查土舍岑芝應否承襲由

再咨四川布政查董鸞襲職以免瀆請由

咨廣東布政德慶州無容再設縣治由

咨兩廣部院裁革三水縣治由

咨兩廣部院應否免連州添設判官巡檢由

卷之九

上

吏部公行 凡十八道

行文選司將舞弊吏張瓊嚴究由

通行各衙門應撥監生定限開送併行國子監轉

示各生無得賄吏由

通行各省將軍民賦役冊速行造報由

咨都察院轉行撫按查取在籍人員分別辦理由

通行京堂應撥監生報缺格式併移國子監示諭

諸生由

咨都察院將貪贓知縣崔廷槐提問由

文敏公全集

目錄

三

咨都察院轉行各省巡按通飭各屬禁革妄差由

劄付知府查勘知縣貪污從實詳報由

咨廣東巡按再將賦役冊詳議併查催廣西文冊

由

咨刑部將作弊書吏黃溥等收問由

行驗封司移錦衣衛經歷呈堂將犯吏送審由

催提錦衣衛犯吏由

再催錦衣衛將犯吏趙永泰等一併送審由

行兵馬司作速拘獲犯吏趙永泰等由

移行犯吏趙永泰等各原籍地方官將該犯拘審

由

咨法司將作弊書吏朱沼追問由

咨都察院轉行各省查議驛站定為中制由

公同集錄

批答王知縣呈由

自識

附錄甬川識

附錄王浚川柬

復浚川

附錄浚川再柬

自識

文敏公全集

目錄

三

卷之九

下

南京禮部公行

統載九十四件

卷之十

上

南京禮部公行

凡一道

行南京禮部儀制司事由

途次公移

凡四道

咨南京兵部刑部都察院巡撫鳳陽都御史事由

牌行徐州兵備道事由

告示

牌行徐州事由

詹事府公行 凡二道

大公集錄 吏部時

上汪誠齋太宰

附錄汪誠齋手帖

與張甬川少宰

附錄張甬川少宰手帖

附錄汪誠齋再柬

附錄張甬川再柬

與張甬川

卷之十 下

文敏公全集

目錄

美

兩廣事宜 統載五十九條

家訓前編

序

合巹男女異路圖說

田圃至子姪 凡十一條只列其綱而已

蒙規 凡三種

彙訓

祠堂詩 五章有解

家訓續編

序

雍睦

友愛上

友愛下

敦睦

家教

婚娶

子弟

子姪

儉德

慎德

文敬公全集

目錄

嗣世不肖

世載穢德

奕世儒宗

奕世清德

陰騭

先德

補遺

凡三首
俱由南海縣志錄出

何雪庄先生傳

靈洲山

七言律詩

其二

五言律詩

石頭錄總目

補石頭錄前編 卷一

石頭錄原編 卷二至卷七

續石頭錄後編 卷八

文敏公全集

目錄

天

霍文敏公全集卷之一 上

疏

大禮疏 辛巳十月八日上時為主事

謹按禮部會議大禮謂我

皇上宜以

孝宗為父

武宗為兄

興獻王為叔別擇

崇仁王為

興獻王後 臣謂此議考之古禮則不合質之聖賢之道則

文敏公全集 卷之一 上 疏

一

不通揆之今日之事體則不順謹按儀禮喪服章云

斬衰為所後者又云為人後者為其父母報是於所

後者蓋無稱為父母之說於本生父母又無改稱伯

叔父母之云也若為人後者宜謂所後者為父母則

經文宜直書曰所後父母豈不徑明易曉也乃惟曰

所後者云爾已矣者之云何外之之辭也於為人後

宜謂本生父母曰伯叔父母則經文宜直書曰為人

後者謂其父母曰伯叔父母其服報豈不徑明易曉

也乃必曰其父母云爾已矣其之云何內之之辭也

漢儒不明其義謬為邪說曰為人後者為之子以誤



後世果如其言則漢宣帝嘗爲昭帝後矣然昭帝叔祖也宣帝姪孫也則孫將謂祖爲父可乎唐宣宗嘗爲武宗後矣然武宗姪也宣宗叔也則叔反謂姪爲父可乎吳之諸樊餘祭四兄弟以國相授蓋迭相爲後矣曰爲人後者爲之子是兄弟自具高曾祖考也而可乎甚矣爲人後者爲之子之說背理也故曰考之古禮則不合者此也天下者天下之天下也非一人所得私也宋儒之告英宗乃曰仁宗於宗室衆多之間簡拔聖明授以大業陛下所以負宸端冕富有四海子子孫孫萬世相承皆先帝之德其意蓋謂仁宗以天下授英宗則英宗宜舍本生父母以仁宗爲父也臣以聖賢之道觀焉昔舜爲天子臯陶爲士瞽瞍殺人臯陶執之舜則竊負而逃是父母重天下輕也若宋儒之說惟其以天下相授受爲恩德之厚遂舍己之父母謂他人爲父母是父母輕天下重也聖賢之心固如是乎故曰求之聖賢之道則不通者此也

孝宗賓天

武宗嗣歷越十有六年于今矣

孝宗在天之靈知有

武宗爲之子也

文敏公全集

卷之一上疏

二

孝宗之心未嘗自謂無嗣也今之議 強欲

皇上重爲

孝宗之嗣何爲者哉議者謂

皇上繼

武宗之統以兄弟昭穆之同不得爲

武宗之嗣猶宜爲

孝宗之子也臣則曰

陛下爲

孝宗之子矣誰爲

武宗之子乎

文敏公全集

卷之一上疏

三

孝宗且有兩嗣子矣

武宗筭無嗣子可乎

孝宗有嗣神有於享矣

武宗無嗣遂無所於享乎臣子於君父一也既不忍視

孝宗之無嗣獨忍視

武宗之無嗣乎若曰

武宗以兄固得享弟之祀矣

孝宗以伯獨不得享姪之祀乎既可越

武宗直繼

孝宗矣獨不可併越

孝宗直繼

憲祖乎

皇上於

孝宗也伯姪也猶子也於

興獻也父子也天性也

武宗無嗣無可奈何矣

孝宗非無嗣者也今之議者乃欲

皇上不考

興獻而考

孝宗是

文敏公全集

卷之一上

疏

四

孝宗本有嗣矣復強繼其嗣

武宗固已無嗣復絕其統

興獻亦無嗣矣是茲舉也於

孝宗蓋無所益於

武宗

興獻不亦大有所損乎昔者

皇上之在藩邸固以

興獻爲父矣今之涖登 大寶也復以

孝宗爲父是一身兩父也天之生物也一本曾謂一人可

以兩父也乎

興獻賓天知有

皇上爲之子也寧知今日

皇上不得爲之子乎故曰揆之今日之事體則不順者此也臣下之爲此議也豈其爲謀不臧不忠於所職乎非也其爲此議也其故有三一曰前代故事之拘也二曰不忘

孝宗之德也三曰避迎合之嫌也夫爲人後者爲之子之說雖背理之甚然由漢迄今千有餘年惑人深矣哀帝誤此不得父定陶王英宗誤此不得父濮王曹魏倡此以誤天下程頤司馬光呂誨諸賢守此以誤後世今日臣子敢謂已之賢智有過程頤者乎有過司馬光諸賢者乎與其獨出意見以招物議也孰與謹守故事之無罪乎故曰前代故事之拘者此也

孝宗御極十有九年深仁厚澤在民深矣窮谷小民言及孝宗猶惻然興思不能已也况今大臣皆

孝宗之所簡任小臣亦荷

孝宗之甄陶感今思昔其忍忘乎

孝宗之嗣

武宗一人而止矣

武宗無嗣

文敏公全集

卷之一上

疏

五

孝宗一脉其止矣

慈壽皇后

中宮皇后熒形子影將何以堪若舉朝臣子皆曰

皇上宜以

孝宗爲伯

興獻爲父遂行尊封之典

國母之來

中宮皇后何禮相見

慈壽皇后接見

國母何禮相處萬一少有過差宮闈遂成間隙將置

文敏公全集

卷之一上

疏

六

兩宮於何地當國大臣異日何顏見

孝宗於九天之上故爲大臣者寧拂

陛下之孝心不敢背

孝宗之遺德寧誤

陛下以非禮不敢失

兩宮之歡心其設心若是而已矣其忠於

孝宗者如此其忍不忠於

陛下乎故曰不敢背

孝宗之遺德者此也韓琦相業宋世罕儔歐陽文章一代

宗主議及濮王典禮舉世非之甚至目爲迎合指爲

奸邪加之鉄鉞韓歐之在當時苟見不定雖刃未及身宜亦毛寒骨悚矣今日臣子誰敢倡父

興獻之說以取獻諂迎合之罪自置其身於不韙之地乎夫避嫌之事賢者不爲奈何今之士夫皆執守謙冲也故曰避迎合之嫌者此也然臣伏見

陛下嘗考

孝宗矣又伏見

慈壽懿旨尊

興獻帝號矣則將如斯而已乎臣竊謂斯禮也天地之大經生人之大倫不可以毫髮差忒者也如或未當

文敏公全集

卷之一上疏

七

酌更之乃所以爲善也昔大舜己未善無所係吝舍己從人人有善不待勉強而取諸己舜之爲相固如此也其爲天子亦如此也

陛下天縱聖德固不吝改過矣在朝大臣尤不吝改過者也然則如之何乃得其當乎臣竊謂

孝宗之視

皇上姪也

皇上強稱之曰考竊恐在天之靈所不安也

興獻之視

皇上子也

皇上改稱之曰叔竊恐在天之靈亦所不安也

孝宗之嗣未嘗絕也強繼其嗣竊恐在天之靈尤所不安也古者帝王之相繼也惟繼其統而已矣固不屑屑於父子之稱也夫維繼其統也則不惟

孝宗之統不絕

武宗之統亦不絕矣若惟繼其嗣也則

孝宗無乃有兩嗣

武宗遂終無嗣亦遂無統乎甚不可也然則如之何乃得其當乎臣竊謂

皇上於

文敏公全集

卷之一上疏

八

與獻王得正父子之名不絕天性之恩於

國母之迎得正

天子之母之禮復於

慈壽皇后

中官皇后處之有其道事之盡其誠無少間隙貽譏後世則於尊崇典禮錯綜斟酌直運諸掌而已矣緣大禮所在臣未敢擅議惟

陛下博訪廷臣博訪天下儒學之士俾各以所見各具疏進其言雖非不罪言之雖是不賞杜迎合獻諂之嫌則臣子自不相拘忌各盡其說

陛下采納之廣自有大中之道矣萬世綱常由此而正萬
世大惑由此而解臣不勝幸甚

文敏公全集

卷之一上疏

九

並入海由是而歷臣不勝幸甚

丁未年之亂自庚申大中之道矣萬世綱常由此而正萬

嘉靖三劄 元年正月十一日上時爲主事

臣恭遇

陛下嘉靖改元式符更化臣不愚陋謹進三劄上瀆

天巖臣之所言固未盡善第鄙夫言之

聖人擇焉天下經綸大經康濟大猷臣不敢與知所知者

特正務緊切一二淺小而已三劄共一通伏願

陛下俯賜優容采納施行天下幸甚

第一劄

臣聞古帝王以道問學修政事爲先務臣所謂學非

口耳無益之謂也臣所言學只居處恭一語盡之夫

文敏公全集

卷之一上疏

十

居處恭孔子所以告樊遲者聖人一言貫徹上下由

入小學而教之則收放心養德性所以立天下大本

者雖初學可能也克其極則修己以敬以安百姓篤

恭天下平聖人功化之極只此三字而已矣居處恭

之目何如曰非禮勿視也非禮勿聽也非禮勿言也

非禮勿動也四者居處恭之目也聖賢實學淺深高

下一以貫之者也世儒不實用力以居處恭爲粗淺

不屑言以四勿爲精深不敢言求所謂主敬之說求

所謂格致之說求所謂戒懼之說惟費口耳全無實

力臣不敢以瀆

聖聽惟願

陛下內省自察於對臨百官之時居處固如此其恭矣於
深宮屋漏之時居處亦如此其恭否乎臣所謂恭非
終日端坐之謂也或行或立或起而應事或倦而宴
息恒存此心不放肆怠惰云爾故夫一日之間豈無
非禮之色非禮之物足供玩好者之奪目乎覺其非
禮勿視之矣左右近習豈無非禮之言非禮之聲奸
佞淫僻者之瀆耳乎覺其非禮勿聽之矣或喜或怒
或愛或惡或慾之動於情而發於言也其有非禮之
失乎覺其非禮勿言之矣或喜或怒或愛或惡或慾
之動於情而見於事作於事而施於政也其有非禮
之失乎覺其非禮勿動之矣此居處恭之工夫條目
也恒存此心而不失則不言敬而敬在其中矣不言
戒懼而戒懼在其中矣聰明睿智皆由此出以此臨
御近習對臨百官事

天享

帝篤恭天下平之要也臣所謂修政事非疲勞無益之謂

也只精任大臣一言盡之今夫天下之政具有舊例

具有故牘故夫區處一事緊切裁決不過數語而翻

查覆據動輒百千萬言

文敏公全集

卷之一上

疏

十一

陛下一日萬幾將遍閱之雖夜以繼日猶見不足將取夫
要者閱之則叢瑣紛沓左右蒙蔽得遂其奸故夫天
下巡按御史兩京六科十三道舉天下之職官臧否
政事得失天下利弊條款上陳

陛下命九卿查據舊例斟酌時宜詳列覆奏

陛下將獨斷之乎則天下之政竭天下之智謀之猶未盡
善况望獨斷之盡善乎是故不免付之內閣今之內
閣惟擬定浮帖進上

陛下然後委之左右斟酌填註由是有事涉左右者得旁
訴倖免有乘機欺罔者妄言事體不便或曰格例不
文敏公全集

卷之一上

疏

十一

合或曰人情不堪甚則曰外臣朋黨護短循私故內
閣原議時有改易

旨意發下動駭人心不塞衆望繼有以爲言則曰屢有旨
了此於

陛下視之極類獨斷然不知喉舌寄於近習樞機轉於左
右貽患流毒極不可言臣願自今章疏

陛下於每日午刻或御

文華殿或御左順門召內閣大臣二員六部尚書侍

郎六員六科給事中六員講讀學士二員侍立內閣

大臣將次日應發章奏條擬旨意面對

陛下斟酌填註面付司禮監次早發行其有論列

聖德糾劾權奸更革大事別爲擢出取裁

聖覽執簡御繁居靜制動

陛下可垂拱仰成不勞智力而天下治矣大臣有奸回不忠面肆欺罔給事中得面糾其過有古今異宜稱量輕重講讀得備

顧問有舉措失宜政體乖謬天下得駁正其失

陛下亦得虛心守正以聽天下而無諱過護短之私大臣亦得取人爲善而無循私妬賢之罪內臣亦得安靖美名而無招權壞事之謗

文敏公全集

卷之一上疏

三

陛下每日只不憚數刻之勞天下自被無涯之賜矣較之遍閱章奏煩瑣叢雜以啟蒙蔽之奸者勞逸萬萬不侔也此垂衣裳而天下治之要也爲學也爲治也其要有如此者然爲學之中蓋未嘗不寓爲治之理在陛下深思實體之而已爾如

陛下恒存四勿之心以臨百官裁萬務暇以讀書史究古今治亂之故則善惡之機愈明瑩而不可掩卽所謂格物知致也善惡明而好惡決好惡決而主宰定主宰定而四體喻卽所謂意誠心正而身修也家齊國治天下平舉而措之一貫之道也爲學爲治體用同

源功效相因又如此伏願

陛下深思實體之以馴究夫不言而化無爲而成之盛天下幸甚

第二劄

臣聞漢文帝入涖大統首問每歲決獄幾何每歲錢穀出入幾何陳平對曰有主者司馬光謂平所對爲非非也大臣惟擇夫主刑獄錢穀者而已責大臣知刑獄錢穀之數非也或者又云文帝非所宜問亦非也蓋知刑獄之數可以覘風化矣知錢穀之數可以知經費矣此文帝之問實人君初政之首務也臣願

文敏公全集

卷之一上

十四

疏

陛下推廣此問可乎如蒙首召戶部問之曰

祖宗朝歲計賦稅所入幾何各省存留幾何

內府需費幾何百官廩祿幾何軍士糧餉幾何三邊供

億幾何藩封祿米幾何內宦月糧幾何較之今日歲

計所增幾何所減幾何然後從而思之曰賦稅所入

猶夫昔也所費所出不有倍於昔者乎年代愈深流

弊愈極盍有以處之乎次召吏部問之曰

祖宗朝外任百官幾何京任百官幾何薦舉幾何科貢幾

何雜流幾何較之今日冗員所增幾何衙門添設幾

何然後從而思之曰輿圖政事猶夫昔也冗員冗食

不有加於昔者乎官添弊冗政紛多門盍有以處之乎次召兵部問之曰

祖宗朝天下軍職幾何京衛帶俸幾何外衛帶俸幾何天下軍士幾何在京勇士幾何校尉幾何較之今日所增幾何所減幾何虛名無實勢豪包辦月糧幾何然後從而思之曰天下疆圉猶夫昔也冗員冗兵不有倍於昔者乎愈久愈冗愈極糧食無措盍有以處之乎次召禮部問之曰

祖宗朝天下

親藩幾何鎮國奉國將軍中尉幾何儀賓幾何內臣幾

文敏公全集

卷之一上疏

五

何較之今日所增幾何所減幾何然後從而思之曰歲計賦入猶夫昔也

宗藩內宦不有倍於昔者乎勢窮則變變則通通則久盍有以處之乎次召工部問之曰

祖宗朝歲計物料所入幾何恆年修理幾何

上用所需幾何各監局所需幾何軍器修理幾何工匠幾何柴炭幾何較之今日所增幾何所減幾何然後從

而思之曰天下課料猶夫昔也浮費不經不有倍於昔者乎繁費日滋帑藏日竭天下日困國計日艱盍有以處之乎次召刑部問之曰

祖宗朝歲決大辟幾何較之今日天下決大辟幾何情真
着監幾何可疑見監幾何然後從而思之曰好生惡
死人心猶夫昔也嗜利忘死不有倍於昔者乎經奏
處決有此數也敲推冤死不有萬於此者乎民無怙
產斯無怙心刑酷民冤國本攸係盍有以處之乎是
故天下一大家也處天下猶夫處家也今夫千金之
家一人享之其百費饒洽也固宜再世有五人焉則
爲二百金之家矣以二百金之家復圖千金之費不
日就窮促已乎雖然二百金之家儉以圖存其不墜
先業也亦宜再世有五人焉則爲四十金之家矣以
四十金之家復圖千金之費不立墜先業已乎雖然
四十金之家猶可擴之爲二百金之家也二百金之
家猶可擴之爲千金之家也存乎人者也天下一大
家也不再擴焉者也限於勢者也我

祖宗創業之初猶夫億萬金之家也

宗藩之分封猶夫子孫也百官猶夫工作也內臣猶夫
臧獲也軍士猶夫守家之犬也歲費供億猶夫家之
調度也率是數者皆如

祖宗之舊猶勢窮槩生尚宜思所以救夫末流之患以適
夫時宜之制奈之何年積月冗於是數者不知幾倍

于

祖宗之舊浮費百出日益日甚不知幾倍于
祖宗之舊是猶承千金之後者不知其已落二百金之家
矣復妄意夫千金之費也若之何其不窮乎

陛下思而及此尚早圖之與內臣外臣協心同憂兢業十
年乃克有濟失今不圖後無及矣今縱未大更張
陛下只時念及此或命六部開具大數揭帖朝夕

觀覽則所以恐懼撙節之思自不能已矣內臣勲戚亦
使之盡心思慮以防夫日後之患以紓夫目前之急
國家得宏久大之圖內臣亦享綿長之福

文敏公全集

卷之一上疏

七

陛下亦能日慎一日心由此正愆由此窒天理常存邪慾
退聽克已復禮之力由此益堅祈天永命之道由此
馴致潛消默運之中自致夫

聖德神功之盛矣天下幸甚萬世幸甚

第三劄

臣聞爲政在救積弊救積弊在正人心正人心在擴
天理以遏人欲由大臣以及百官常存天理本心爲
政不難矣臣謹畧舉積弊數事例之在京七十二衛
原額軍數具有冊籍邇年浥爛無存宏治十八年清
查冊亦多殘缺軍士校尉勇士投克人役或勢豪影

占有名無人或寫字軍八包頂數役近奉

詔書裁革俱無完冊可考故凡革退人役或許稱首逖復役或詐病故補役蒙准行查彼則內賄本司猾胥外賂衛所官吏矇朧保結本司惟據結狀明白革冊無名季報有名便與准收緣該衛革冊或存革錯陳季報文冊復三月一換後先互異奸弊淵叢雖竟日磨研不過開吏胥一騙局數年之後官轉弊生員名奸猾復鑽隙投回盜騙倉糧矣前日革退軍匠工部具奏爲之收補據其容稱原額軍匠九千名數今惟一千餘名審若是不查究七千名役俱在逖何處原

文敏公全集

卷之一上疏

六

籍故絕何處戶口然後爲之從長計議或行原籍勾補或查何人影占可也乃遽爾奏收經革人役隨據該衛呈稱前項二千餘名俱先年有名無人包辦月糧虛數夫然後知奸風未熄利徑猶開該部官員復蒙誑罔如此竊謂今之軍士旗校猶得少有所稽以宏治十八年清查冊畧存耳然各衛汜爛或有或無故於清查漫無於考卽今清查一番投克虛名之弊十去五六臣願乘此機會行在京各衛遵照宏治十八年事例通將查過軍士旗校戶口籍冊重新造報詳註軍祖克發補伍來歷戶下餘丁名數貫址鄰佑

姓名用堅厚冊紙裝寫每衛所三本一本戶部以驗支糧一本兵部以驗收操一本衛所存備查考冊完仍委科道部官三員照冊點驗如敢作弊官吏重治庶案籍有微而弊端永絕人安分義而奸風可弭也武選掌武蔭凡軍職告襲例查祖宗立功陞遷來歷查黃比試爲法最詳然歲月愈深事例愈繁軍職承襲愈久功罪事跡愈多應襲人員到京未投公文先請承行吏胥奉數十金幸其接受明日投文乃免查駁不然則或將緊切字面畧爲洗改或駁查遠年功罪展轉往回困費空竭故凡武官襲職甘心納賄儒官初任政未諳練拱手仰成以吏爲師吏滿三年金箱玉囊每盈千數夫職官犯賊動干行止今坐視吏胥之貪猾汙濫而不能禁何也舊例繁文之所束縛凡其進言動有機括制之則無術究之則無跡故也茲弊也吏部考功禮部儀制皆然考功則磨勘考滿起復官員儀制則尋空

王府儀賀歲貢換印員役故凡吏胥頂頭需銀數百餘兩夫辦事云爾屬籍之初已破數百金之費則其所圖也不有千百千萬者乎京師天下之極六部百司之表乃貨賄公行如此何以訓天下乎在別部臣不

敢言惟武選之法願

陛下命大臣集議遵照三年一次清黃事例盡查天下內外武職員數詳其功罪考其祖宗相承或叔姪兄弟相繼或洪武永樂年間立功或宣德以後陞授或內臣弟姪恩蔭或勲戚駙馬子孫或武舉取中分爲數等卽今軍職冗甚宜默寓汰省之法於是或許之世世承襲或許之止終本身或許之兄弟叔姪相繼或不許相繼於查汰之中默寓激勸之典裁處已定開具籍冊分布各省轉布各府州縣印刻榜文在京懸之兵部在外懸之各都司衛所俾凡武職承襲皆自

文敏公全集

卷之一上疏

二十

今年爲始人人皆知如某者許襲如某者不許襲如某者終本身如某者兄弟叔姪得相繼如某者不得繼畫然分明冊黃俱以今年爲定冊籍清查一勞永逸人人自便不致祈哀於吏胥之門矣其於該司考滿官員仍開具有無送問過受賂吏役以驗殿最庶貪風先絕於六部王化首被於京師然後人心可救弊俗可回也職方主天下征伐功賞舊制文官不預武爵武職不濫文階實防閑末世之深慮奈何天順以來始有以尚書竊武蔭者始有各省奏捷部司官亦預功賞者始有撫按混同奏捷以冒軍功者始有

巡撫官以軍功蔭兒男者夫巡按本以紀功閱實糾正虛濫兵部主文移區畫調度皆職分之常也曾謂此可以受賞乎苟人出死命以立功吾亦隨其後以竊賞平日所食厚祿何爲者乎賞者所以勸小人也文臣職業卓異自有別格超遷循至三品則恩蔭及子亦足矣乃忘其爲俎豆之列而竊介冑之賞可乎使撫按兵部官屬皆預功賞則爲之朦朧奏捷以敗爲功亦有之矣孰爲之矯正覈實使賞罰得當乎故夫往年軍功冒濫羊頭狗尾之徒克滿天下皆巡按御史兵部官員共爲欺罔之罪也今日士論惟知歸

文敏公全集

卷之一上

疏

三

咎權奸亂政冒濫軍功不知軍功之濫不始於正德初年而始於正統以後皆巡撫失於紀驗兵部失於駁正之罪也其所以紀驗失實駁正不行者始也怵小人之威終也同小人之利之罪也

臣願

陛下命大臣集議凡自正統以後或總兵總鎮奏帶或內臣恩蔭或撫巡弟姪尋常軍功陞授武職俱准終本身今後巡按御史兵部官屬勿預軍賞巡撫兒男勿預武蔭必儒臣各安其分不萌僥倖之圖然後內臣自服其心小室谿坑之慾君子小人各得所止卽過人欲擴天理之幾也江西功賞御史黎龍有言江西

之事不難於成功而難於倡義此論約而盡蓋宸濠初反海內震驚江彬弄權四方離析內外人心多懷觀望故若王守仁伍文定謝源伍希儒劉源清張文錦楊銳輩必皆肯棄九族然後肯倡此役故論功固宜首王守仁伍文定而謝源伍希儒則別省公差非有地方之責者使二臣不預其事入亦莫罪其非也謝源乃甫到南安未會守仁先檄兩廣此臣居家時目見也伍希儒亦於吉安同爲守仁所奏留蓋皆協心比義共獎忠勤者也嘗讀唐史見巡遠窮死四鄰不救爲之廢書唾罵若謝伍二臣不以其非守土之

文敏公全集

卷之一上

疏

三

任越職分以勵忠節此其所以高出唐人之右也賊滅功成江彬張忠妬忌守仁之功首倡異論曰守仁實同賊謀又曰寧賊金寶俱諸臣滿載一空隨經紀功給事御史黨奸扇讒附和其後蓋將媒孽守仁輩而傾之也後以守仁名望素著不能瑕玷而謝源伍希儒獨當其辜時有進表叅議僉事二員經過吉安亦爲守仁挽留共圖舉義二臣懇脫以去其意蓋謂事成不過陞官不成卽滅族故也後見伍希儒謝源被黜欣然告人曰予當時幸不預事乃有今日若在其中不知將置我於何地矣夫禍變忽生人皆解體

使忘家倡義者不以爲功反以爲罪後有事變人將指二臣以爲覆轍誰肯越職分以效忠乎天下之事有常變君子應機有經權聖人操三綱以立人極如權衡稱物低昂屢變不失其中臣觀管仲事子糾小白殺子糾蓋齊襄既没小白子糾皆羣公子未有君臣之分委質爲臣斯爲之君矣子糾實管仲之君也管仲不死子糾之難反臣小白狗彘之類也若王珪魏徵特東宮官屬唐室公臣當建成之難王魏在列身殉死之可也時不預難高祖以二臣輔導無狀賜之死可也高祖許之勿死則勿死亦可也其於管仲

文敏公全集

卷之一上

疏

三

全不相似後之君子乃深罪王魏而孔子特許管仲爲仁何也此孔子不輕於與權之精意宋儒莫之或知也蓋天下大義有父子之分焉有君臣之倫焉有中國夷狄之等焉義在君臣則忘父子義重夷夏則畧君臣此孔子春秋稱量之權也荆楚橫暴周室衰微岌岌乎有混宇宙爲夷狄之患偶有才如管仲輔相桓公攘荆蠻以尊中國脫天下被髮左衽之禍其救世之仁大矣故孔子畧其臣節之失許其仁人之功雖忘君事仇行類狗彘俱赦之矣此孔子稱量之權衡萬世之人極也若謝源伍希儒者乃不論其倡

義勤王之功聽貝錦雌黃之口以文致其罪而黜之
豈聖賢應世宰物之權度乎變起倉卒鄙夫小人縮
首觀望惟奮不顧身者勇以集事變亂旣平然後腐
儒俗吏騰口舌以繩其短此豪傑所以不得伸氣小
人所以多僥倖也曾讀歷代國史有書攻某州得縣
幾何戶口幾何者矣曾有書曰得財寶幾何者乎蓋
破城克敵子女玉帛士卒所趨必變定兵戢主將乃
得申號令封府庫用兵之常也故凡誓師必曰戮力
克敵敵之所有皆汝有也如不克敵身首不保曾有
誓師鼓勇之初預申取虜貨財之禁乎當時省城初

文敏公全集

卷之一上

疏

三

復強敵在外正稍寬約束鼓舞銳氣之時也圖大計
者可屑小苛乎使宸濠不就擒滅縱橫南北天下府
庫不知何如賊人金帛尚得計量其多寡乎就使二
臣果有黷載金寶之實猶斷以大義勿恤小瑕爲忠
勤後日之勸况此流言張忠許泰之所鼓揚祝續章
綸輩之所附和名教罪魁之邪說耳君子亦信之乎
二臣貶責不足輕重第恐因此褫天下忠義之魄後
難爲忠公任事之臣耳若南都守臣各省撫按事變
之初則縮頸俛眉擇趨舍之便賊平之後則攘臂稱
首爭保障之功其間真有防閑奔走之勞亦職分當

寬仁在窮民

太祖之心堯舜好生之心也周家承商俗沈湎之後羣飲者殺夫飲酒人之常情耳羣飲之罪豈遽可殺蓋俗染已深非極嚴掾之不可也今夫人之貪財猶夫人之好酒無厭者必敗五臟五臟敗卽死期將至矣好色無厭者必竭精血精血竭卽死期將至矣好財無厭者必犯刑憲刑憲叢積卽死期將至矣夫是三者皆殺身物也然而人不畏焉反爭趨焉何也愚之極也我

太祖皇帝嚴刑禁賊官所以掾賊官死命也雖嚴以治之

文敏公全集

卷之一上疏

五

實寬以生之也猶夫周之酒誥所以保全商人也夫酗酒者非死刑不禁亦猶好色強姦者非死刑不禁也則犯法奸貪者我

太祖以死刑治之萬世帝王安養天下之法也邇年賊濫之弊文選賣選法武選賣駁查職方賣推舉考功賣考劾吏胥得贓動以百計儀制則親藩請封吏胥索贓亦以百計外任百官朝覲考滿送內閣銀百數兩送吏部銀百數兩送科道十數兩乃得考語稱職故京官利外官賄賂外官藉京官庇覆內外交通奸賊成市故臣前日賊官處絞之議不惟得罪外官

實亦得罪京官不惟得罪一人實亦得罪天下是無怪乎都察院謂爲過甚而沮不行也臣見外任臧官或法外科徵或納賄鬻獄皆以剝民骨血扼人之喉而奪其食且非酷刑則臧不可得故凡貪官衙門則獄多寃命原其情罪豈直處絞而已惟寬縱既久遠治以嚴則人之犯法者衆如盛夏之夜條繼以隆冬則物之凍死者必多矣故臣猶欲姑緩教戒之俟

敕諭三年然後行刑則臧官縊頸而死亦可以妻子勿怨也此法內外百官亦不願行蓋人人省身多犯此罪

故也惟

文敏公全集

卷之二上

疏

三

聖斷必行則天下廉吏始有所勸窮民始有所倚矣臣嘗

謂處天下猶夫處家也爲一家之主者必計一歲所入制一歲所出復樽節別儲以備凶荒然後其家可保若不計其家田畝租入之多寡而多畜奴婢多畜狗馬多營房屋多崇侈靡一歲所入僅供一歲所需甚或預借再歲之入以救今歲之急則其家業決不可保矣凶年饑歲欲妻子勿流離豈可得也處天下亦若是而已矣臣願

陛下先命戶部會計天下每歲賦入何如上供所需何如宗藩祿米何如文官廩祿何如內臣祿米何如

皇子卽封

興王主行祀事以孫祀祖

皇考寢廟之在安陸亘千萬年得祀用天子禮樂所謂以

天下養養之至也卽今祀祭祝詞則曰

皇帝孝子敢昭告于

皇考興獻皇帝所謂爲天子父尊之至也禮曰父爲士子

爲天子諸侯葬以士祭以天子諸侯是也由是所生

不廢天倫所承不嫌兩大上足以慰

孝宗

武宗

文敏公全集

卷之一上

疏

三

興獻在天之靈內足以慰

慈壽皇后

中宮皇后付托之願而

陛下所以尊

親養

親之孝亦帝舜以下一人而已矣若護衛軍士皆

陛下官爵則前日裁革不能數千今日陞授輒復數千

固啟冒濫之弊非

太宗之典矣猶其小者也惟軍士俱授陞級安戀京師

皇考陵廟之在安陸風木如昨護衛蕭條

聖魄神衷不免淒涼之感

九重萬里寧忘戀慕之私興言及此其忍令前日官軍之俱北乎天下賦稅困及小民臣不盡知姑以蘇州

推之

臣聞同知廖碍云蘇州正糧一百九十九萬有

奇耗糧一百萬有奇通正耗三百萬有奇蘇州賦額之定於初因賊虜張士誠之舊固已過重矣後以漕運之費正糧一石復加耗五斗是重中又加重也乃於交納細糧復需二石或二石八斗乃納一石是加重之中又倍加重也故凡糧長之私取夫民也不知幾倍小人所以益困也蘇州舊有金花銀二十五萬有奇折民糧六十萬有奇有綿布一十五萬有奇折

文敏公全集

卷之一上疏

三

民糧十九萬有奇惠小民計也貪官以奉權貴竊謂蘓州賦稅甲天下蘇州困敝亦倍于天下不知尚能變而通之少寬數分俾民蒙數分之賜否乎或細糧上納聽戶部同科道驗收委官轉解糧戶不與內臣百交可乎原額正耗不能減矣或於細糧減數上納水次兌運加數取盈可乎折銀之惠俱歸窮民若爲權貴之資也許御史覺察或聽民自陳可乎舉蘇州而天下可類推也舉細糧而各監局之解料可類推也天下軍士困敝臣不盡知惟聞主事劉漳云往年

邊軍糧餉不繼有司建議行撙節之例每糧一石價

銀一兩二錢其於收受也惟折八錢餘四錢則官吏漁獵之矣於給軍也每糧一石惟給四錢存留四錢謂之樽節以糧之實直計之軍士一月得實糧三斗三升而已邇年饑荒糧運不足兼之守臣極力苛刻凡軍糧上納盡攘而歸諸其家虛出通關以蔽覆其攫奪之罪軍士實糧升勺不沾也惟甘凍餓而已於樽節者每糧一石剩銀四錢則樽節一年宜餘一年之積乃其所也今則毫釐不存蓋守令兵備守臣競盜互竊而空之也將稽之則各邊陸賊出沒不時動調客兵隨在給餉客兵去駐率無定日主餉官吏因

文敏公全集

卷之一上

疏

无

遂爲奸或經過一日而加稱數日或屯住數日而加稱旬日則邊軍枵腹之所留適資其鼠竊之奸計而已夫盜邊糧者服上刑典法具在邇年禁令寬弛貪墨如市若不深切懲劄則人心何由反正風俗何由挽回是宜委風力御史通查三邊庫藏通查三邊州縣客兵經過屯駐日期則彼此互相證驗日月互相稽查少有虛張自互相錯誤而不相爲謀雖欲掩之不能掩矣然後通將往年盜竊之徒投餉狗鼠爲貪墨之戒其守臣攘奪軍糧剝削軍士尤積年極弊倘

行御史覺察以聞

陛下斷在必誅勿容幸免庶幾人各懷刑而欲心由遏天
理不死而頽風可回也舉三邊而天下可類推也天
下夫役困敝臣不盡知姑自天津推之天津內接通
州外連滄州上下各三百里夫役兩路俱遡逆流天
津原無措給惟三衛軍士出辦夫役或課稅贏餘之
銖錙而已臣嘗詢其出辦之數每支軍糧一石扣其
錢十八文蓋扼其喉而奪之食也且月糧有限過客
無窮故於供需日每不足經過人員不體悉其困苦
已極且有意外之索如拽船夫役可十人而足則責
取二十三十名數仍取軍伴數人以供執事其夫役

文敏公全集

卷之一上疏

三

之數掌於軍職督速之勤權於兵備權要人員求不
滿望則專咎兵備而讒謗橫流言官隨之糾劾吏部
隨之罷黜惟於往年得一人焉極力幹旋身自答應
土人號曰金帶驛丞乃得保全陞任其餘非左遷則
罷去故擢天津兵備多皺眉以行臣竊計之將責有
司以奉權貴則剝奪軍糧將繩有司尅減軍糧則取
怒權貴邇時言官劾方面官員罕能自明故於考覈
之年只著不謹不職數字則其人其官可指日計矣
世瀆道敝中人以下不以失得動心而喪所守誰乎
况望之以曲意徇人而責之直躬守已不尤難乎是

宜更爲禁例凡經過人員驗有關文付與夫役自十
名至十五名而止該衛按季將應過夫役開具文冊
呈巡按御史轉送都察院兵部互稽焉因得劾夫貪
求大甚者其兵備官再勿預夫役之數則經過人員
無從責求亦將無如之何以去矣按季應過夫役按
月減過軍糧部院從實稽焉則武人奸利亦不能遁
也由天津迤南之弊則曰進貢折乾之酷也權豪需
索之濫也包攬人役之蠹也撥夫耆老之奸也皆積
年法禁所先者惟寬縱廢弛視爲文具耳倘行巡按
御史嚴法痛懲亦救敝政挽頽風之一事也舉天津

文敏公全集

卷之一上疏

三

而天下可類推也天下課稅之弊臣不盡知姑自廣
東推之南雄有抽分廠舊也清遠例外增置焉梧州
有抽分廠舊也肇慶例外增置焉禁宰耕牛舊也邇
年宰牛不禁而稅其皮革焉清遠肇慶兩廠稅及竹
木稅及魚鹽稅及草束稅及荷擔之柴薪細民磨髓
剝骨一錢之利不逃稅焉歲入數千其宜也牛皮之
稅聽宰耕牛誨民爲盜天下皮革兩廣居多計其歲
入以千萬數亦宜也乃此三款額外之稅撫按不稽
所入之數案牘不詳所費之由剝民膏脂克已囊橐
欺天奸利人莫之知也倘行撫按備細稽查拘原領

其事者詰所入所費之籍使磨民者戒而好貪者懲可也南雄許稅鹽稅椒木例也邇年雜貨有稅牛羊有稅稅及魚苗稅及猪畜稅及鷄犬各有牙人以司其事不知稅入歸之誰也若椒木之稅則尤甚焉者椒百斤使司稅銀一兩南雄稅銀伍錢木百斤使司稅銀伍錢南雄稅銀二錢有司過重爲例者也商人以其過重不堪也圖爲苟免之計或賄權豪附載以行或賂牙人瞞騙以免其於使司全不投稅直至南雄以圖僥倖倘蒙發覺然後出首投稅以去在使司徒有重稅之名全無貨稅之入故椒木稅于南雄歲

文敏公全集

卷之一上疏

三

盈萬千軍餉入於使司百無一二爲今之計孰若輕其稅而嚴其禁凡椒百斤使司稅銀伍錢南雄稅銀二錢凡木百斤使司稅銀二錢南雄稅銀一錢照行帖票俱從使司給發自今南雄勿開出首之例凡無使司帖照全沒之官倘有漏網土人覺察一半給賞漏稅商人仍比私鹽論罪則其投稅費不數星苟圖欺詐全費沒入吾見商人寧輸毫末以保無虞不倖錙銖以貽後悔所稅者輕而所入者衆是所取雖寡而所獲反多矣且投餘利以惠商人不驅厚賄以歸貪猾由是權豪無附載之私土人無牙行之利郡守

無貪黷之謗使司饒軍餉之資矣其餘雜稅俱從禁革牙人奸貪遇

詔不改倘行撫按拿置重刑亦懲貪風以挽頽俗之一事也舉廣東而天下可類推也天下冗官臣不盡知姑

言其槩蘇州水利以都御史之權選守令佐貳之不畏強禦不避謗肯任怨者相便宜以督其役足矣乃冗設卽中二員可謂左計也何也都御史之督責不能必行於卽中而卽中之威令不能必行諸郡守御史之於卽中復勢相軋而職不相維調遣官員甲可乙否十羊九牧徒見紛紛耳且以都御史猶不能督

文敏公全集

卷之一上疏

三

率郡邑則卽中將手足胼胝以從事乎都御史不能有爲須卽中然後集事則將焉用彼爲乎寺部卿丞帶俸添註日益日甚不知設官將何爲乎如爲政事設也則一官宜任一職今一職添註數員何爲者乎由卽中司務以至主事競求外差爲家鄉便利之圖也然建官一員將任一職也苟一員差出一職無缺何不遂併此員省去之乎外省錢穀出卽中員外督速之則藩郡有司之職廢矣夫今日之部官卽他日之有司曾謂爲部官則能督速錢穀爲有司遂不能乎故夫賞罰不明而姑息成俗雖增官百倍愈紛紛

如也何益乎藩臬則添設管糧叅議提學副使海道副使兵備僉事屯田僉事一事添設一官則原額官員何爲者乎原額兩司年換一道由是地方盜賊互相推延惟期苟且一年不復留心急務新舊遷轉吏弊由滋不知於原額叅政叅議副使僉事之選授卽定註某員管某道某道兼某職則事固不廢專職原額遂不加增可乎郡縣佐貳或添註四員三員凡此冗員俱老耄監生艱難省察或納粟入監希圖厚獲者故於未選則揭債以往受任則携孥以行舉十數口以仰食一官責望一官以富厚一世則政何由不

文敏公全集

卷之一上疏

三

樊民何由不窮是將添官以任事實因官以生事也識治體者寧不深思遠慮爲國家分憂乎今日之官可謂具備矣乃政愈不修尙也曰闡茸老弱徒取克位之弊也曰官增事冗人循已私之弊也曰虛文陋習大壞士風之弊也今之選任由貢途者四十外而後貢五十外而後仕由雜流者四十歷事五十受官輸粟者則破數百之貲圖千百倍之利者也由舉途者則敦崇廉耻勁直剛毅在在有之然精力耗於晚年志節奪於家累亦不能免也故夫由數途以出者多自計曰由今以往尚可幾年人之計之亦曰由今

以往尚可幾年人無遠望先懷近憂未入官門先營家計苞苴賄賂奪魄動心事曲民寃如聾如啞隸役得肆豺虎之威吏胥得張機穽之術小民蒙害不可言也故曰闖茸克位之弊也姑以一民計之令丞數員得治之矣守佐數員得治之矣藩屬數員得治之矣臬屬十數員得治之矣御史數員得治之矣都御史得治之矣以十數官員而治一民以一民而聽數十官員之令故訟不平者原訟者訴之縣被訟者訴之府原訟者訴之司被訟者訴之院縣之判曰某曲也府翻焉司之判曰某曲也院翻焉案牘紛更好吏

文敏公全集

卷之一上

疏

姜

爲市政令更張令曰宜如此守曰宜如彼司曰宜如彼院曰宜如此官自爲政人逞己私小民耳目爲之眩惑吏胥案牘由是混淆是原額正員不秉公心弊且至此况額外添註冗外加冗徒爲身利者乎故曰官冗循私之弊也御史請學兩司平坐府州守倅見御史無跪制也邇年兩司見御史屏息曲躬御史出入守令門跪陋也臣觀大臣之承

責也俛首而已禮也兩司見御史曲躬磬折甚於戚施是敬御史過於敬

陛下也羣臣候

陛下於郊視牲也拱立兩列而已禮也守令候御史門跪
甚於皂隸是敬御史過於敬

陛下也藩臬守令行之固足醜恥御史偃然安之亦不知
何如其心也晨起倉皇走候御史幾及卓午乃敢退
歸其有巡鹽御史復詣巡鹽之門其有清軍御史復
詣清軍之門其有巡撫都御史復詣巡撫之門守令
復詣兩司之門沿河當路復勤過客之迎送首垂氣
奪於奔走之時志亂神昏於退歸之後復有精力以
及民事乎故耳目寄於吏胥威權移於皂卒民害愈
甚官政愈乖故曰虛文陋習大壞士風之弊也今欲

文敏公全集

卷之一上

疏

三

圖治莫急於去冗官欲去冗官在清仕路在正士風
在畧虛文在明教化在久職任仕路清而後官治理
士風正而後真才出虛文畧而後積弊除教化明而
後習尚美職任久而後衆志定官治理則一官足兼
數事不分一事以任數官矣真才出則一人足兼數
人不必數人僅供一役矣積弊除則紀綱正而職守
定禁令明而案牘清矣習尚美則士行敦而民心淳
古風回而刑罰措矣衆志定則人懷遠圖不計近利
盡心其職不苟且其謀矣夫然後冗官可省也夫然
後天下可治也今之守選候缺數盈幾何可得而知

也雜流輸粟數盈幾何可得而知也貢舉進士數盈幾何可得而知也不有鞅掌淹滯選法阻塞者乎不有儉邪僥倖攀緣鑽刺者乎夫欲禁其末流於既進之後孰若清其本源於未進之先輸粟入監非廩增生員俱冠帶榮身言官之請可行也或於應授職任加級閑任雜差照常優免亦塞其願望之一事也吏役嚴加考選次等以下冠帶榮身丞簿之屬留任歲貢可也貢例勿再多開進士之選或二百名或三百名間一行之亦其可也中書官屬冗員猥多邇年寄俸寺部猶尸位中書亦甚矣攀援乞哀者裁而汰之

文敏公全集

卷之一上疏

三七

可也清仕路之術也

陛下先務在任內閣吏部吏部先務在任十三道巡按御史兩京十三省督學憲臣內閣吏部誠意正心修身以端風化巡按御史督學憲臣誠意正心修身以廣風化大本立而達道行淳風回而正氣復矣正士風之本也部屬官進

朝則衣錦綺謁吏部則不衣錦綺此畏吏部甚於畏

陛下也巡撫考滿走揖四司門外尊官重臣猶屈體吏部

官員初選投親供於文選猶云例也徧投四司何爲

者乎授任既定文選付行三司足矣乃四司俱必索

焉鄙夫由是起吏部權要之心士夫由是有屈體求媚之醜虛文之用至小心術之害極深罪人就戮一親供足矣儒官乃四親供焉是待儒官不若罪人也外任守令趨起偃僂免顧鼠拱不敢喘息焉士風正氣大壞於吏部之初也起復擯廢官員原吏部者還之吏部原給事御史者還之給事御史俾朝士指之曰某也去國若干年矣某也去國若干年矣今也得際

聖明其人之自慶亦曰幸矣復遇

聖明以見天日則忠貞直諒者得益堅其節懦夫劣士得

文敏公全集

卷之一上疏

三

少激其氣爲助最不小也今也若前給事中劉荏若御史高公韶范輅若員外郎戴冠若主事李中率陞外任以低首受制於人惟庸碌保位者乃得養資待年以陞京職則懦夫何所激貞士何所勸乎此士風正氣大壞於變故之後也吏部反此以端風化於內巡按御史禁兩司之曲躬守令之門跪以申風化於外然後人敦節槩士知廉耻也正士風之術也今之仕者以奔走應對爲公事以臨民泄政爲不暇以拜謁勤劬爲恭謹以直躬守職爲戾俗故夫多賢能之旌者其奔走之捷者也多不職之劾者其朴直之拙

者也問刑以深刻爲能催科以峻急爲功案牘以彌
縫爲巧御衆以狙詐爲術故能聲著者虐焰張者也
祿位固者智囊密者也績最虛文之弊也無用冊籍
縣解之府者年計數十府解之司者年計數十每解
一冊費銀數兩謂之扛解腳價不知紙僅百葉實袖
手可持也所收籍冊用飽蠹魚惟扛解銀乃其實利
判獄案牘申請公移建言章奏翻覆彌縫故紙克棟
官司不能遍閱吏胥借爲利媒案牘虛文之弊也生
儒文課倩人代錄呈之教師亦飽蠹魚惟朔望走有
司之門習軟靡之態熟趨利之術而已間有自謂知

文敏公全集

卷之一上

疏

三九

務亦呻其咕畢騁其浮華志在利名心同賈術身心
性情之實學經綸康濟之實功莫之或知也心術大
壞於教養之時志業遂卑於效用之後學校虛文之
弊也反其弊而救之畧虛文之術也令出而人從之
速者莫若督學憲臣故督學者好諂諛則一省皆佞
舌也好文藻則一省皆縞辭也好實學則人將反躬
也好實行則人將易轍也何也不如是不見容重故
也况夫仕有官守

朝廷懸其的以示之人心有不歸往乎今之人耳目鼻
口猶夫古之人也聲音笑貌猶夫古之人也何獨於

心而疑之堯舜所以聖純天理絕人欲而已矣學者
希聖擴天理遏人欲而已矣擴天理遏人欲不在乎
他覺悟之間而已矣故覺焉則應舉所業涖官所行
皆天理至中之矩也故於言心身者求吾之身心何
如於言齊家者求吾之處家何如於言治平者求吾
之致用何如不于其跡於其心不同其事同其理實
心實力優悠積久大覺生生焉聖賢之徒也督學之
任求若人之先知先覺者克焉明教化之術也任官
者惡其不才也而亟去之繼有不才者焉不勝其去
矣惡其貪墨也而亟去之繼有貪墨者焉不勝其去

文敏公全集

卷之一上

疏

四

矣故官可日計則人無遠謀不才者亟去其才者率
難自見才亦化而不才矣貪者亟去不貪者率難自
見不貪亦化而貪矣是故寧容小疵勿爲大苛凡各
選授俱限九年乃行黜陟非貪酷彰聞勿輕廢棄政
績卓異貢舉超擢與進士同則人人俱有遠大之期
自無苟且之念歷練之久不才者將化而才矣溫飽
之久貪者將化而不貪矣視諸急選急去之者何如
也責久任之術也清仕路以閑其始責久任以要其
終正士風以定其趨明教化以立其本屏虛文以救
其弊然後人脩職業政有綱紀不勞智力而天下治

而冗員可省也 國初用人薦舉爲重貢舉次之科舉爲輕今則科舉爲重貢舉次之薦舉不行矣故有行同盜跖心劣商賈者能染翰爲文俱隸仕籍此士風所以偷盜也孔子告仲弓爲政曰舉賢才舉爾所知蓋謂人舉所知則天下無遺才也今之人於所知不敢舉焉避嫌也甚矣其與聖人之心殊也天下遺才臣不盡知臣所知者鄉有二人焉雄才多能早知趨向臣不如廣州府學生員甘學患難正志窮守益堅臣不如從化縣儒學生員林克忠二臣者較之天下之賢才則固不足視諸臣之庸碌猶見有餘古以

文敏公全集

卷之一上

疏

四

五百金買馬骨不一年千里馬至者三若二臣者固未敢謂之賢才也若

陛下行有司取用之天下真才因以出矣且著爲令凡巡按御史年舉遺才實德兩人則人之實行敦矣亦復古餼羊之一事也亦振揚士氣之一機也見任官自立碑上言大臣德政禁也所以防獻諂盜名之奸也邇來有司多結納奸猾耆老虛名腐儒托之腹心以揚虛譽奸猾無恥之徒爲獻諂苟利之術爲之鼓扇愚民哀歛財賂爲之構豎生祠逢迎取悅無恥有司借是以盜名欺世竊取美官奸險小人借是以籠絡

有司希圖財利一人作俑羣奸效尤故凡守令多爲此舉聽人愚弄狡譎之徒多以此舉低昂官司俗土庸官受其脅劫奸人詭術遂爾橫行賄賂交通政體大壞上下互相誑誘邪佞成風土木冒披冠裳生人變鬼夫人誠心爲善自不求知人或過譽適增愧赧况此妄誕者乎幽明異用天地之大界也好名者僭竊鬼神之職分不亦極乎耳目口鼻猶爲世人意態精神已入鬼錄不亦醜乎饕餮不廢鷄豚晨夕復兼香火不亦利乎真風淪逝世道日偷一至此極伏願行天下撫按通查所在生祠不問其人之存沒賢否

文敏公全集

卷之一上疏

望

通行除毀夫古之良有司以毀淫祠爲美事不知淫祠祀禱惟以鼓扇愚暗敗壞風俗而已生祠則蠱惑高明陰壞人心雖豪傑迷焉而不自覺蓋淫祠之禍之尤烈者也若洗而去之亦正人心之要機也振土風之一助也東廠行事冤陷平民極矣近日軍校橫預朝議不亦甚乎天下軍衛一體也錦衣等衛獨稱親軍備禁近也錦衣復兼刑獄不亦甚乎天下刑獄付三法司足矣錦衣衛復橫撓之越介冑之職侵刀筆之權不亦甚乎光武崇高節名節之士滿東都以扶漢鼎宋祖敦廉恥刑罰不加衣冠忠義之徒爭死末世

江西事變死者四人而已足驗今之喪廉恥賤節義者衆也顧不係所養乎節義之士在乎世甚無用也於變故求之不得國事遂空故夫保養士氣敦崇節義乃治天下者深遠謀也士夫有罪下之刑曹辱矣顧使官校當衆執之脫冠裳以就鎖梏屈體貌以聽武夫朝列清班暮幽汗獄剛氣由此折盡矣不亦甚乎使有重罪或廢或誅可也乃暮脫汗獄朝立清班解下拘攣便披冠帶使武夫悍卒指之曰某也吾辱之矣某也吾得辱之矣小人遂無忌憚君子遂昧良心豪傑所以多山林之思變故所以少節槩之士也

文敏公全集

卷之一上

疏

望

昔漢文帝以賈誼一言士夫遂不加戮辱曾謂

陛下聖德肯讓文帝乎伏願自今東廠勿預

朝議錦衣衛勿治刑獄士夫有罪宜謫則謫宜廢則廢宜誅則誅宜贖則贖勿加笞箠勿加鎖梏以培養廉恥以勵激節義此於世教甚非小補蓋救人心之至急者也振士風之至急者也雖然尤有急者君臣之交是也我

太祖高皇帝諄諄貽謀惟曰君臣同遊

宣宗皇帝常召尚書夏元吉同遊西苑泛舟射鳧飲酒甚

歡

英宗皇帝日召學士李賢面決政事

孝宗皇帝日召尚書劉大夏咨詢密謀蓋皆唐虞三代賡

歌告戒和氣滿堂在

殿陛則爲君臣處燕閒則爲師友之風也

陛下且不遠法三代只近法

祖宗首復

君臣同遊之盛六部大臣講讀學士許不時進

謁或命坐賜茶或講論經史如古之君臣師友則凡

聖德神功憂勞積久自有不言而化者矣無爲而成者矣

二帝三王之事也臣于瀆

文敏公集卷之一上疏

器

天嚴不勝恐懼待罪之至倘蒙

容宥優納施行天下幸甚萬世幸甚

聖旨該衙門知道

